

هَدِيَّةُ أَعْصَابِكَ

الطبعة الأولى

١٤٤٤هـ - ٢٠٢٣م

اسم الديوان:	هذي أعصابك
اسم المؤلف:	محمدي محمدي
التدقيق اللغوي:	محمود البكري
تصميم الغلاف:	ياسمين ناصر
الإخراج الداخلي:	خالد محمود
رقم الإيداع:	٢٠٢٢ / ٢٥٢٢٧
الترقيم الدولي:	٩٧٨-٩٧٧-٨٦٤١٠-١-١



ش - حسن خطاب - قسم يوسف بيك - الزقازيق - الشرقية



01020439639



massar.pub1@gmail.com



مسار
للنشر والتوزيع
Massar Publishing & Distribution

جميع الحقوق محفوظة، ولا يسمح بإعادة إصدار هذا الكتاب، أو أي جزء منه، ورقياً أو إلكترونياً، سواء بشكل كامل أو جزئي أو عرضه مجاناً عبر أي وسيلة وبأي شكل من الأشكال من دون الحصول على تصريح خطي من دار مسار للنشر.

هَدِيَّةُ أَعْصَابِكَ

ديوان بالعامية المصرية

مجدي محمدي



هَدَاة

إلى روح زوجتي
كانت نعم الزوجة ونعم الأم لأبنائي
أسأل الله أن يرحمها
ويسكنها الجنان ..

بين أيديكم
بعض الكلمات التي خرجت من
قلب صادق ..
عبّرت فيها عما يحيش في نفسي
من آمال وآلام ..

مجدي محمدي ،،

بين يدي الديوان : رسالة إلى لغتي

إوعي تنسي يا لغتي إني خادمك وحبيبك
ولو رحت في يوم لغيرك مش ممكن راح أسيبك
ده أنا هيان بحبك يا غالية وواحد من محاسيبك
إوعي تنسي يا لغتي إني خادمك وحبيبك

لو كتبت كلمة بغيرك مش معناه إني بأهينك
غرضي إني أوصل كلامي لناس مش فاهمينك
غرضي إني أخلي كثير من الناس عايزينك
لغاية ما ييجي اليوم وكل لسان ما يقدر يسيبك
إوعي تنسي يا لغتي إني خادمك وحبيبك

هو أنا أقدر أبعد عنك يا لغة الرحمان
هو أنا أقدر أنكر أو حتى أخون العرفان
لأ يا لغتي والله ما أقدر على النسيان
أنا خلاص وقعت في حبك ودايب في دباديق
إوعي تنسي يا لغتي إني خادمك وحبيبك

عهد مني يا لغتي إني أعرف عليك الكل
عهد مني أخليكي في العيون وردة وقل الفل
عهد مني أرجعك عزيزة بعد طول الذل
عهد مني أحفظ حروفك لشبابك وشيبك
إوعي تنسي يا لغتي إني خادمك وحبيبك

إِيمَانِيَّات

رحلة مع سور القرآن

فيه مرة واحد فتح فاتحة صافية للقرآن
 وقرأ البقرة و كمان بعدها قرأ آل عمران
 وكان معاه النساء من أهل بيته العمران
 وجلسوا على مائدة عليها من الخيرات ألوان
 وتلذذوا بلحوم بعض الأنعام السمان
 والتزموا بالأعراف المعروفة بدون نسيان
 وطلعوا بعض الأنفال لواحد فقير غلبان
 وعزموا على التوبة و الرجوع للواحد الديان
 وسمعوا قصة سيدنا يونس وهود كمان
 أما قصة سيدنا يوسف فركزوا عندها الأذهان
 وكانت آياتها زى الرعد في الوجدان
 أما قصة سيدنا إبراهيم فقرأوها بإحسان

وجلسوا في الحجر جنب النحل الطنان
 وتكلموا عن الإسراء والكهف والفتيان
 أما مريم فحكّت لظه عن الأنبياء على مر الزمان
 وقررت الأسرة الحج مع المؤمنون والخلان
 وحسوا بالنور الساطع بعد قراءة الفرقان
 واستمعوا لبعض الشعراء من بعض البلدان
 الي تكلموا عن قصة النمل مع سيدنا سليمان
 وحكوا القصص عن العنكبوت وبيته الوهنان
 ووصفوا حرب الروم وذكروا سيدنا لقمان
 وكل ده استحق السجدة والشكر للمنان
 الي هزم الأحزاب ودمر سبأ بعد الكفران
 سبحانك يا فاطر الكون البديع الفتان
 أما ياسين فكان بيحفظ الصافات مع الشيخ حسان
 ووقف قصاد الزمر وقال يا غافر العصيان
 يا الي آياتك فصلت وتستحق التدبر والإمعان

وجعلت لنا الشورى حقيقة مش زخرف ولا دخان
 يارب خلي آياتك جاثية وراكزة في كل كيان
 وحفظ الأحقاف لولدنا محمد وكمآن عثمان
 وبكره الفتح جاي من ورا الحجرات والجدران
 يارب خلي المؤمن وقاف ضد الطغيان
 وخلي مكاييد عدونا ذاريات ومصيرها الخسران
 واحفظ سينا والطور من كل عدو جبان
 وخلي للدين النجم العالي مع القمر يا رحمان
 وخلي الهزيمة واقعة بأعدائك في كل أوان
 يا قاهر الحديد والناس المجادلة بالبهتان
 نجح يوم الحشر القلوب الممتحنة في الامتحان
 وطهر الصف يوم جمعة الأحاب والإخوان
 واطرد من بيننا المنافقون وعبداء الأوثان
 وارحمنا يوم التغابن من الفضيحة وطلاق الجنان
 وخلي تحريم المعاصي سمطنا يا مالك الملك والأكوان

واكتب بالقلم يوم الحاقة و المعارج لنا الغفران
وعلمنا من نوح والجن إزاي نفهم البيان
وخلي المزل والمدر يستعد ليوم القيامة مع بني الانسان
وبكرة تيجي المرسلات ومعها النبأ والإعلان
يا رب ياللي أمرت النازعات بسحب الروح من الأبدان
حفظ ولادنا عبس والتكوير بإتقان
والانفطار والمطففين والانشقاق يا حنان
يا رب خلي بروج الإسلام في أعلى وأسمى مكان
وابعد عنها كل طارق بشر يا أعلى من أي سلطان
وارحمنا يوم الغاشية بحق الفجر والبلد الأمان
يا رب ياللي خلقت الشمس والليل والضحي الصحوان
اكتب شرح صدورنا يا خالق التين والرمان
وحفظ ولادنا العلق والقدر يا عظيم الشان
يا رب ثبت البينة في القلوب بدون زلزلة الأركان
وخلي نفوسنا ليك كالعاديات وخلي القارعة في الحسبان

ولا تفتنا يا رب بالتكاثر وعصر الافتنان
 ولا تجعل فينا همزة مشغول بالأموال والأثمان
 ودمر أعداءك بفيل قريش الكبير المتنان
 وخلي الماعون خيار عبادك الرابع الكسبان
 واسقيهم من الكوثر وانصرهم على الكافرون الآن
 وحقق لنا النصر واربط بالمسد مكاييد الشيطان
 وارزقنا الإخلاص والحب والذل ليك والإذعان
 يارب الفلق ورب الناس اختم حياتنا بالإيمان
 واجعل كل مؤمن بذكرك وقربك دايمًا فرحان
 واجعل قصورنا في جنتك بعدد سور القرآن

أهل الجنة

يارب أكرمني واجعلني من أهل الجنة
يارب خليني من أهلها أعيش فيها واتمّنّى
يارب اديني وحقق لي كل الي باتمّنّى
يارب أكرمني واجعلني من أهل الجنة

يا سلام عليك يا جنة ربنا يا أم الثمن أبواب
يا سلام عليك يا الي أهلك كلهم شباب
يا سلام عليك يا الي لميتي الصفوة والأحباب
أنا مشتاق لك جدا....أنا مش قادر أستنى
يارب أكرمني واجعلني من أهل الجنة

ياللي غافل عن الجنة هو عقلك راح فين؟!
 ياللي غافل عن الجنة إوعى تنسى الملكين!
 إوعى تنسى إن ربك بيشوف الي ماتشوفه عين
 إوعى تنسى إن ميزان ربك أعلى من ميزاننا
 يارب أكرمني واجعلني من أهل الجنة

خَلِّي الجنة يا مؤمن حيّة دايمًا قدام عينك
 خَلِّيكَ مصاحب الناس اللي فعلا شارينك
 خَلِّي ذكرك لربك يجري دايمًا في شرايينك
 دا ربك كتب جنته لكل من بذكره عاش واتغنّى
 يارب أكرمني واجعلني من أهل الجنة

جهنم المعذورة!

دون كل من كتب حاكب عن جهنم المسعورة
حاكب عنك لاني عارفك مؤمنة ومأمورة
حاكب لاني عارفك على العصاة حزينة ومفطورة
والله يا جهنم إنت في غضبك حقيقي معذورة
دون كل من كتب حاكب عن جهنم المسعورة

ياللي غافل عن جهنم ياريت تاخذ بالك
ياللي غافل عن جهنم ياريت تصحح أحوالك
اقرأ عن كل اللي فيها وبعدين افعل ما بدالك
خلي عينك على الآخرة واحذر الدنيا الغرورة
دون كل من كتب حاكب عن جهنم المسعورة

جهنم نارها نار ولا كل النيران
 جهنم نارها ليها لسان كما الوحش السعران
 جهنم نارها تدوب الحديد والجبال والجدران
 ليه العناد؟ ليه البعاد؟ يا أهل العقل والمشورة
 دون كل من كتب حاكتب عن جهنم المسعورة

أنا يا جهنم عارفك وزهدت في الدنيا علشانك
 أنا يا جهنم بجاهد عشان أقلل من سكانك
 أنا عارف إنك جندي وسلاحك هو نيرانك
 إوعي تحفظي اسمي أو تأخذي مني صورة!
 دون كل من كتب حاكتب عن جهنم المسعورة

خلي نكالك على الله

جرب وخلي تكالك على الله بجـد
جرب وساعتها هتتحس بطمأنينة ملهاش حد
جرب وهتتحس بقوة تقدر تهد الجبال هد
جرب وهتلاقي بينك وبين اليأس أكبر سد
جرب وخلي تكالك على الله بجـد

فكر معايا يا مهموم وبص كويس للمشكلة
فكر وقولي وجاوب معايا على شوية أسئلة
إيه الي يمكن يعصى حله على ملك القوة الهائلة
إيه الي يمكن يقف قدام الي حل مشاكل ملهاش عد
جرب وخلي تكالك على الله بجـد

بسط الأمور وخلي إيمانك بربك جامد
هون على نفسك وحس بالنعم وخليك حامد
واطرده الشيطان من قلبك وخلي اليأس خامد
وكثر ذكرك لربك وشد عزمك أكبر شد
جرب وخلي تكالك على الله بجـد

ربنا كبير وعالم بالنفوس وعارف همومها
ربنا رحيم وقادر يطرد عنها أمراضها وسمومها
ربنا حكيم وفرض عليها صلاتها وصومها
ربنا كاتب الأرزاق ومقدرها سواء براحة أو بكـد
جرب وخلي تكالك على الله بجـد

مدرسة الصحابة

دخلت مدرسة الصحابة أدرس وأطالع وأتعلم
دخلت مادد إيدي على كل واحد فيهم بأسلم
دخلت وفرحتي خلتي واقف مش قادر أتكلم
دخلت مدرسة الصحابة أدرس وأطالع وأتعلم

وأول سلام كان على القمة سيدنا أبو بكر الصديق
وقفت قدامه أسمع له وأحس بقلبه الرقيق
وقفت أشكي له زي الصديق للصديق
لكنه صبرني بأن النور هيطلع مهما الدنيا بتضلم
دخلت مدرسة الصحابة أدرس وأطالع وأتعلم

وثناني قمة كانت جبل شامخ اسمه عمر الفاروق
 جبل يجبر على احترامه وإعظامه أي مخلوق
 جبل انضرب بيه المثل في العدل وإحقاق الحقوق
 واتمنيت عليه يكون لكل مسؤول ناصح ومعلم
 دخلت مدرسة الصحابة أدرس وأطالع وأتعلم

وثالث قمة كان سيدنا عثمان أبو النورين
 الصحابي الوحيد الي فاز من بنات المصطفى باتنين
 الصحابي الي كان بيستحي منه الجميع مع الملكين
 الصحابي الي جعل ماله خدمة لدينه وعمره ما اتندم
 دخلت مدرسة الصحابة أدرس وأطالع وأتعلم

والرابع قمة تقف قدامها معجب ومبهور
 صحابي اسمه أبو الحسن زوج البتول الطهور
 سيدنا علي بن أبي طالب الشجاع المشهور
 اللي كان أول صبي يدخل الإسلام ويتقدم
 دخلت مدرسة الصحابة أدرس وأطالع وأتعلم

والخامس صحابي عظيم اسمه سيدنا أبو عبيدة
 صحابي تقرأ عنه تخرج من حكايته بأكثر من فائدة
 صحابي بهمته كلمة ربنا بقت في كل الدنيا سايدة
 صحابي سماه أمين الأمة نبينا صلى الله عليه وسلم
 دخلت مدرسة الصحابة أدرس وأطالع وأتعلم

وأقول كمان عن مين واللامين يا إخوانا
 المدرسة مليانة بعظماء محتاجين فهمنا وإيماننا
 المدرسة عايزة ناس فعلا بتحب دخول اللجنة
 المدرسة عايزة ناس قلوبها على أحوالنا بتتألم
 دخلت مدرسة الصحابة أدرس وأطالع وأتعلم

مدرسة الصحابة ٢٤ ساعة فاتحة أبوابها
 المدرسة بترحب وتفتح ذراعاتها لطلابها
 المدرسة مجانا ومش طالبة أموال تدخل في حسابها
 المدرسة عاوزة ناس تحب دينها وعلى دعوتها بتتخدم
 دخلت مدرسة الصحابة أدرس وأطالع وأتعلم

كيد الشيطان

سبحانه ربي العالم بالنفوس الخبير اللطيف
سبحانه الي قال على كيد الشيطان ضعيف
ليه يا مؤمن بالعظيم تعمل للشيطان تكليف
أنا معاك الشيطان شاطر وفي الغواية حريف!
أنا معاك إنه نقل أبونا من الربيع للخريف
أنا معاك إنه شاطر في التكتيل والتكتيف
وكم ان شاطر في تقريب المعاصي والتأليف
يعني يقدر يعمل حاجات كتير كلها تخاريف
لكن أنت يا مؤمن شوف معاك مين يا حصيف
معاك رب بيرعب الشيطان من التخويف
معاك رب بيدافع عن كل مؤمن شريف
معاك رب قادر يصونك ويخليك عفيف

معاك رب قادر يمحي ذنوبك وترجع له نظيف
 إوعى يا مؤمن تغرك المكاييد والتلافيف
 وقوم جدد التوبة وقول خلاص مفيش تسويف
 ولا تحمل هم لقمة وسيب على ربك التصريف
 والي معاه ربنا عنده هم الثقيل زي الخفيف

ساعِد غيرك

جرب تساعد غيرك بلا مصلحة أو مردود
جرب ترسم بسمه على وجه حزين أو منكود
جرب تمسح دمه يتييم بقلب ودود
جرب واحكي لي هتلاقي في قلبك ايه موجود؟
جرب تساعد غيرك بلا مصلحة أو مردود

حتندم كتير ياللي عايش لنفسك وبس!
اسأل غيرك الي حب الناس بأي شعور حس؟
اسأله عن سعادته وخذ منه أكبر درس
اسأله هتلاقيه أسعد إنسان في الوجود
جرب تساعد غيرك بلا مصلحة أو مردود

فرق كبير بين حياتنا وحياة الغابة
 إحنا بشر بنحس ببعضنا ومش شوية ديابة
 إحنا بشر أصلنا مية وللأسف شوية ترابة
 والشاطر الي فهم فينا إنه خليفة المعبود
 جرب تساعد غيرك بلا مصلحة أو مردود

فكر كويس يعني إيه إنك خليفة ربك
 يعني إيه تفكر بعقلك وكم ان تشعر بقلبك
 يعني إن ربك بعد موتك راح يحاسبك
 فكر كويس انت بالجنة واللا بالنار موعود؟
 جرب تساعد غيرك بلا مصلحة أو مردود

صدقني يا صاحبي كلامي مش مجرد شعارات
صدقني وجرب قبل ما الأوان يكون فات
صدقني وحس بكيانك وحاول تحقق الذات
صدقني انت من غير المحبة طريقك آخره مسدود
جرب تساعد غيرك بلا مصلحة أو مردود

ربك وعد بعونه كل من يعين غيره
وعده بأجر كبير ويزود رزقه ويكثر خيره
ووعده كمان بثبات على الحق ويصحح سيره
يلا شمري يا صاحبي وخلي ذراعك بالعون ممدود
جرب تساعد غيرك بلا مصلحة أو مردود

مناجاة

الحمد لله العظيم الي ثبت لي ديني و إيماني
 الحمد لله العليم الي من أسر المعاصي حماني
 الحمد لله الكريم الي خلي طاعته دايمًا في إمكاني
 الحمد لله الرؤوف الي في القلوب حجز لي مكاني
 الحمد لله الرحيم الي ثبت جوايا إنساني
 الحمد لله اللطيف الي عمره بلطفه ما نساني
 الحمد لله الودود الي خلى ذكره دايم على لساني
 الحمد لله القدير الي خلصني من شهوات حابساني
 الحمد لله الهادي الي لطريق الخير هداياي
 الحمد لله الواحد الي بفضله لباب المسجد وداني
 الحمد لله الفتاح الي فتح أرزاقه على القاصي والداني
 الحمد لله الغفار الي ورث دعوته لأحفادي بعد ولداني
 الحمد لله العلي الي على سلم الأبرار دلني وعلاني

الحمد لله البصير الي طهرني من الذنوب الي عالاني
 الحمد لله الرحمن الي صحح عيوبي الي هازماني
 الحمد لله المنعم الي خلى دينه شعلة في زماني
 الحمد لله الحكيم الي اداني الحكمة الي لازماني
 الحمد لله القادر الي مدني بالقوة لقهر شيطاني
 يا رب احفظ بلدي الي جوا عينها والله خطاني
 يا رب رجعني لبلدي أحضنها وأمشي في غيطاني
 يا رب خلي ولاد بلدي في قلبي هم أعز خلاني
 يا رب اهد كل من على طريق الخير سابني وخلاني
 يا رب خلي محبة دينك سارية في كل وجداني
 وخلي عيون الناس في دروب الخير دايا واجداني
 يا رب اهديني وثبتني ونور دربي بقرآني
 يا رب أنا عبدك الي لدينك مخلص ومتفاني
 يا رب اختم لي بالإيمان يوم ما حأل بس أكفاني
 يا رب نسي جهنم اسمي وخلي الجنة عارفاني

واحد مبيصليش

نَفْسِي أَسْأَلُ كُلَّ وَاحِدٍ مَبِيصْلِيْشِ
 نَفْسِي أَسْأَلُ كُلَّ وَاحِدٍ لِّلْمَسْجِدِ مَا بِيْجِيْشِ
 إِزَايِ أَنْتِ قَادِرِ تَتْنَعِمُ وَتَعِيْشِ
 إِزَايِ تَخْلِي دَفْتَرِ حَسَنَاتِكَ فَاضِي عَلَى مَا فِيْشِ
 نَفْسِي أَسْأَلُ كُلَّ وَاحِدٍ مَبِيصْلِيْشِ

أَنْتِ مَشْ عَارِفِ إِنْ الصَّلَاةَ صَلَاةٌ مَعَ رَبِّنَا
 أَنْتِ مَشْ عَارِفِ إِنْهَا حَتَّغْفِرُ ذُنُوبَنَا
 أَنْتِ مَشْ عَارِفِ إِنْهَا صِلَاحٌ لِّقَلْبِنَا
 أَنْتِ مَشْ عَارِفِ إِنْكَ مِنْ غَيْرِهَا مَا تَسَاوِيْشِ
 نَفْسِي أَسْأَلُ كُلَّ وَاحِدٍ مَبِيصْلِيْشِ

راجع نفسك يا غالي قبل فوات الأوان
راجع نفسك واسمع كويس كلمات الأذان
حي على الصلاة حي على الفلاح حي على الإيمان
قوم وجدد إيمانك واحذر من التشويش
نفسى أسأل كل واحد مبيصلش

الشیطان حيقولك يا راجل أجل شوية
رد عليه وقول له وهي أيام عمري بإيديا ؟
قول له اخسأ يا لعين وطفني ناره بالميه
واغسل ذنوبك بالوضوء قوم يالالا ما تنحلش !
نفسى أسأل كل واحد مبيصلش

عابد المال

يا عابد المال تسمح لنا بسؤالك
 هل بصيت في المرايا وأنت بتعد أموالك
 بص كويس وشوف ودقق وتأمل أحوالك
 وأتحدأك ساعتها لو عجبك الشكل الي قبالك
 يا عابد المال تسمح لنا بسؤالك

أنا عارف طبعا إنك حتشوف نفسك
 لكن حتلاقي إن المال ساجنك وحاسبك
 حتلاقي حاسب آلي هو الي لابسك
 ياريت تسمعني بقلبك وتنسى شوية أشغالك
 يا عابد المال تسمح لنا بسؤالك

نفسى شوية تتأمل معايا في كلمة مال
حتلاقيها كلمة تلبس صاحبها شوية خصال
كلمة تسبب فتنة بتخرب وتقطع الوصال
كلمة تغريك بالحرام وتقلل شوية حلالك
يا عابد المال تسمح لنا بسؤالك

أنا مخلص في نصحك ومش فيلسوف
لكن صعبان علي أمنك يتبدل بخوف
صعبان علي أشوفك على الخطام ملهوف
صعبان علي قتلك لحسك ونفسك وخيالك
يا عابد المال تسمح لنا بسؤالك

حقيقي من قلبي وأنا صادق في كلامي
أنا عايزك بقلبك ومشاعرك تكون سامي
شيل المال من قلبك وصدقني حتلاقيه نامي
المهم إنك تحب الناس زي ما تحب حالك
يا عابد المال تسمح لنا بسؤالك

إسلامنا عاوز إيه؟

إسلامنا عاوز مسلم بيحب ربنا قوي
إسلامنا عاوز مسلم يحب الناس ومش منطوي
إسلامنا عاوز مسلم طريقه دوغري مش ملتوي
إسلامنا عاوز مسلم بيعض بسناسنه عالطريق السوي
إسلامنا عاوز مسلم بيحب ربنا قوي

إسلامنا عاوز مسلم عارف ليه خلقنا ربنا
إسلامنا عاوز مسلم بيعس باللي في قلبنا
إسلامنا عاوز مسلم يحزنه إنه يكسر ذنبنا
إسلامنا عاوز مسلم عاوزنا تحت الحق ننضوي
إسلامنا عاوز مسلم بيحب ربنا قوي

إمتى يا مسلم هتفوق وترجع تاني لصوابك؟!
 إمتى هتسمو لجنّتك وتنفض عن نفسك ترابك؟!
 إمتى هتدوّر بجد عن أجرك وحسناتك وثوابك؟!
 إمتى هترجع لنبع القرآن تشرب منه وترتوي؟!
 إسلامنا عاوز مسلم بيحب ربنا قوي

إسلامنا عاوز مسلم خبير بالدنيا ودهاليزها
 مسلم الدنيا هي اللي عايزاه مش هو اللي عايزها
 مسلم محدد أهدافه وعازم بجد إنه ينجزها
 بالعربي مسلم يكون مدقق ومخربش وفهلوي
 إسلامنا عاوز مسلم بيحب ربنا قوي

الحجاب حجاب

إوعي يا مسلمة تتأثري باللي بيهاجموا الحجاب
ويكفيك إن اللي بيحاربك بيحارب رب الأرباب
خلي جمالك محفوظ حافظي عليه من الذباب
ويكفيك معاك سنة مشرفة و كمان معاك الكتاب
إوعي يا مسلمة تتأثري باللي بيهاجموا الحجاب

يا اللي بتهاجم الحجاب بالله عليك رد وجاوبني
ليه لما أستر حريمي ليه إنت عاوز تحاسبني؟
عري حريمك إنت، أما أنا حل عني وسينني
و عيب على شنب الرجالة لما يتمرمغ في التراب
إوعي يا مسلمة تتأثري باللي بيهاجموا الحجاب

حجابك يا أختي و الله ليكي أعظم شرف
و كل عاقل و فاهم بكلامي قـرو اعترف
أما المهاجم فيكفي حياته كلها ضنك و أرف
والتعري ما وراه إلا الفساد وضياع الأنساب
إوعي يا مسلمة تتأثري باللي بيهاجموا الحجاب

حجابك يا أختي عمره ما كان بس قطعة قمـاش
حجابك معنى ورمز عمره ما يفهمه اللي ما يسواش
حجابك وصية عظيمة من ربك ياريت ما تنسيهاش
حجابك يا أختي جاب الجنة أما التعري فإيش جاب؟
إوعي يا مسلمة تتأثري باللي بيهاجموا الحجاب

كلمة أخيرة ليك يا اللي أشعلت الفتــن
ربك وحده عالم بجهرك وكم ان اللي بطن
استغفر وركز وخاف على نفسك من المحن
وربك كبير ويغفر ذنوب العبد اللي تاب
إوعي يا مسلمة تتأثري باللي بيهاجموا الحجاب

الجار قبل الدار

لو خيروك بين أبو جهل و أبو بكر مين يكون جارك
فكر على مهلك لو سمحت وحدد لي اختيارك
طلع كل اللي في قلبك ياريت ما تخفي أسرارك
وخذ فكرة عن الاثنين قبل ما تأخذ قرارك
على فكرة أبو جهل ماترك فتنة إلا وفيها شارك
إوعى نفخته الكذابة تخدعك وتشد اغترارك
أبو جهل يقطع البركة لو في يوم دخل دارك
أبو جهل كله ظلمة ممكن تطفئ كل أنوارك
أما أبو بكر فهو رمز و قدوة وفوق كل أفكارك
أبو بكر يكثر في بيتك أحبابك وأبرارك
أبو بكر أحب حبيب لحبيبك ونيك المبارك
أبو بكر يسمو بفكرك ويعليك بين أقمارك

فإيه رأيك لو لقيته واقف فـي انتظارك؟!
اختيارك لـجارك متوقف على أحوالك وأخبارك
أبو جهل في جهنم ياريت تخليه في منظارك
وأبو بكر في الجنة وخلي عقلك مستشارك
بـعملك الفاسد حتخلي أبو جهل جحيمك ونارك
وأبو بكر حيكون معاك لو حققت على الشر انتصارك ..

طابور الجنة

يا اللي عاوز الجنة خليك واقف في الطابور
 انتبه في الطابور وحافظ على مكانك
 حافظ عليه ولو هتعض عليه بأسنانك
 حافظ عليه لأجل قصر هناك انبنى علشانك
 حافظ عليه واحذر الباطل الي حواليك بيدور
 يا اللي عاوز الجنة خليك واقف في الطابور

طابور الجنة ماشي بعدالة مافيهوش وسايط
 طابور الجنة منظم من غير عسكري بشرائط
 طابور سكّته واضحه من غير خطط ولا خرايط
 اصبر ورابط وخليك ثابت ومعاك رب غفور
 يا اللي عاوز الجنة خليك واقف في الطابور

اصبر في الطابور عشان اللجنة تستاهل
اصبر وسيبك من كل منافق أو دجال جاهل
اصبر وحافظ على مبادئك وإوعى فيها تتساهل
اصبر وتذكر فرحتك ساعة نجاحك يوم النشور
يا اللي عاوز اللجنة خليك واقف في الطابور

دينك دينك

دينك دينك	احفظ دينك
خلي شعارك	بيني وبينك
دينك دينك	الله يعينك
وابعد ابعد	عن شياطينك
إوعى شمالك	إوعى يمينك
خلي آمالك	قدام عينك
إوعى صحابك	يلووا حنينك
دول أعدائك	دول حاسدينك
قول لصحابك	لو عايزينك
إن مبادئك	دوم مالينك
وإن عيوبك	مش ساجينك
وطول ما الطاعة	رمز سنينك
الله يعزك	الله يزينك
دينك دينك	احفظ دينك

رمضانيات

مدرسة رمضان

صدق من قال إن رمضان مدرسة كبيرة
مدرسة بتتعلم فيها دروس عظيمة وكثيرة
مدرسة بتعرفنا تفاهة ملذات الدنيا الحقيرة
ويا حظ النفوس اللى بتكون بالفهم جديرة
صدق من قال إن رمضان مدرسة كبيرة

وأول درس يا إخوانا طبعاً هو الإخلاص
الإخلاص اللى يخلى المسلم يصوم لله بس وخلاص
واللى بيخلى المسلم للحسنات راصد دايماً وقناص
وحلمه كله يقابل ربه بدون أي ذنب أو جريرة
صدق من قال إن رمضان مدرسة كبيرة

والدرس الثاني هو الإحساس بجوع الفقير
فأنت صائم بالرغم من أن الأكل قدامك كثير
وفي غيرك مسلمين بدون طعام أو حتى حصير
فاتعلم يا مسلم إزاي ترحم النفوس الفقيرة
صدق من قال إن رمضان مدرسة كبيرة

والدرس الثالث يا جماعة هو الصبر الجميل
الصبر اللي يزهدك في طعام قلبك إليه يميل
ويخليك كمان تصبر على الطاعة وع القيام الطويل
فيا حظ النفوس اللي بتظل فيه لذكر الله أسيرة
صدق من قال إن رمضان مدرسة كبيرة

رمضان ضيف

رمضان ضيف بعد أيام ناوي يزورنا
 رمضان ضيف يكثر حسناتنا ويزود نورنا
 رمضان يحميننا من نفوسنا وهو حصننا وسورنا
 رمضان ضيف خفيف مش شوكة في زورنا !
 رمضان ضيف بعد أيام ناوي يزورنا

رمضان هدية عظيمة لنا من ربنا
 رمضان يلمنّا في حصنه ويزود حبنا
 رمضان يشفع عند ربنا إنه يغفر ذنوبنا
 رمضان شاهد علينا وعمره ما هيعذرنا
 رمضان ضيف بعد أيام ناوي يزورنا

شمر يا مسلم وقابل ضيفك بالترحاب
شمر يا مسلم وراجع نفسك وافتح الباب
شمر دا ضيفك طبعه بيحب العبد الي تاب
شمر دا ضيفك كريم وهو الي بيغسل صدورنا
رمضان ضيف بعد أيام ناوي يزورنا

رمضان وحده مدرسة بتخرج أجيال
رمضان يعلمنا الصبر ومراقبة ربنا المتعال
رمضان يعلمنا دروس عملية من غير ما تتقال
هو ده دور رمضان معانا .. احنا بقى ايه دورنا ؟
رمضان ضيف بعد أيام ناوي يزورنا

قوم يا صاحبي

قوم يا صاحبي نستقبل شهر التجلي
 قوم وصوم حببي وزكي وصلي
 قوم وداوم على ذكر ربك تملي
 قوم ونظف قلبك من السموم وجلي
 قوم واملا كل ذرة من قلبك بالحب حلي
 قوم وخلي كل الهموم وراك تولي
 قوم وسبيك من دا عادي أو دا قالي
 قوم وسبيك شوية من كم جنيه اليوم دخلي
 قوم وارفع طموحك زود الهمة غلي
 قوم وابني قصرك في الجنة ياللا علي
 قوم وافتح لي قلبك قلّي كلامك وصللي

جايلك يا ليلة القدر

جايلك يا ليلة القدر ياللي أفضل من ألف شهر
جايلك يا ليلة القدر ياللي فيك من الكنوز ما يملا نهر
جايلك وطالب إيد الجنة وجايب معاي المهر
جايلك وفاكك قيودي وقلت للشيطان كفاية قهر
جايلك يا ليلة القدر ياللي أفضل من ألف شهر

جايلك يا ليلة القدر عشان أرفع فيك قدري
جايلك يا ليلة القدر ونور القرآن ييضوي في صدري
جايلك ومجهز نفسي بالايان وصابر من بدري
جايلك ورافع شعار الاخلاص عالي في السر والجهر
جايلك يا ليلة القدر ياللي أفضل من ألف شهر

جايلك يا ليلة القدر ياللي نزل فيك القرآن
 جايلك يا أمل كل صايم ييشع في قلبه الإيمان
 جايلك وسايب ورايا متاع الدنيا وأنا مش ندمان
 جايلك وأنا خايف من نار جهنم اللي بتصهر العظام صهر
 جايلك يا ليلة القدر ياللي أفضل من ألف شهر

يارب اكرمني واكتبني أنا وكل مخلص من العتقاء
 يارب سامحني واختم لي بالنجاح بعد رحلة الشقاء
 يارب وفقني واجعل قلبي رمز المحبة والنقاء
 يارب ده أنا جايلك شاكر و بايس إيدي وش وظهر
 جايلك يا ليلة القدر ياللي أفضل من ألف شهر

عيد الصائمين

يحق ليك تفرح ياللي خارج من شهر الصوم
يحق ليك تفرح ياللي صمت رمضان ثلاثين يوم
يحق ليك تفرح ومفيش حد يقدر يوجهلك لوم
يحق ليك تفرح ويارب تكون الفرحة علينا دوم
يحق ليك تفرح ياللي خارج من شهر الصوم

ربك سبحانه وتعالى سمى اليوم بيوم الجايزه
سماه كده عشان النفوس الي للرضى دايا عايزه
سماه كده للنفوس الي يوم الحشر هتكون هي الفايزه
سماه كده للنفوس الصاحية مش الي حابة النوم!
يحق ليك تفرح ياللي خارج من شهر الصوم

اليوم عيدك يا صايم عن كل المحرمات
اليوم عيدك يا قايم لله في بحر الظلمات
اليوم عيدك يا دايم على الذكر والطاعات
اليوم عيدك وحسناتك عند ربك هتكرت بالكم
يحق ليك تفرح ياللي خارج من شهر الصوم

إوعى يا مسلم يوم عيدك تنسى الغلابة
إوعى تنسى إخوان ليك نايمين على الترابة
إوعى تنسى الأقصى اليك لسه في إيد الديابة
إوعى تغرق في بحر الشهوات وانت جاهل بالعموم
يحق ليك تفرح ياللي خارج من شهر الصوم

نبويات

كلمة إلى الحبيب

اسمح يا رسول الله لحبيبيك إنه يـكـلـمـك
 اسمح لي يا الي صلي عليك ربك وسلمك
 اسمح لي يا الي ربك وحده هو الي علمك
 اسمح لي يا الي حتى عدوك برضه كرمك
 اسمح يا رسول الله لحبيبيك إنه يـكـلـمـك

حبي ليك يا رسول الله ما توصفه كلمات
 حبي ليك يا رسول الله لو احتاج إثبات
 أقول ورثت ولادي كلهم حبك بنين وبنات
 وإني باغضب لله لو لقيت حقير ييشتمك
 اسمح يا رسول الله لحبيبيك إنه يـكـلـمـك

أنا عارف يا حبيبي إن حال أمتك مايل
 أنا عارف إن كل الأعداء عليها بتتحايل
 وأنت عارف إنني لهديك وستت شایل
 سامحني يا حبيبي إذا كان حالنا بيؤلمك
 اسمح يارسول الله لحبيبك إنه يكلمك

عهد مني يا حبيبي أحافظ على ديني
 عهد مني مالييني بيجري في شراييني
 عهد مني من كل شر وسوء ييحميني
 عهد مني يا ديني إنني أصونك وأقدمك
 اسمح يارسول الله لحبيبك إنه يكلمك

أكبر حماقة

أعتقد إن أكبر حماقة إنك تشتتم رسول
وارد إنك تشتتم وزير أو حتى أكبر مسئول
قول ياعم فيه زى ما إنت عاوز تقول
لكن أعتقد إن أكبر حماقة إنك تشتتم رسول

عمل لك إيه الرسول ياخايب عشان تسبه
عمل لك إيه الرسول الى جاي برسالة من ربه
والى كل من سمع عنه أو شافه كان بيحبه
وكل من يكفر بيه باب الرحمة فى وشه مقفول
أعتقد إن أكبر حماقة إنك تشتتم رسول

أظن يا أوروبا هجمتكم ما ليها وصف إلا الحقارة
فين التقدم فين الآداب فين الحضارة؟
هي دي حرية صحافة يا أهل الاستشارة
أخيرا نجمكم العالي بدأ خلاص في الأفول
أعتقد إن أكبر حماقة إنك تشتتم رسول

يا اللي شتتم الحبيب تعالى شوية نتعرف
حبيبنا نسبه معروف عالي و شيء يشرف
ورسالتة واضحة ومعاها كتاب عمره ما تحرف
وهمه كله ينقذ الناس وباله بيهم مشغول
أعتقد إن أكبر حماقة إنك تشتتم رسول

وأحب كمان أزيدك من الشعر بيت موزون
 حبيبنا رمز لكل خير وعلامة على كل مزيون
 وعمره مانطق بعية ولا دعا على الي زيك يا محزون
 استغفر ربك على فعلتك واتمنى منه القبول
 أعتقد إن أكبر حماقة إنك تشتم رسول

سامحنى يا حبيبي على الي حصل وأنا موجود
 فداك نفسى يا أغلى وأعز من فى الوجود
 وربنا وحده كفل لك العصمة من كل حقوق
 ويكفى إن الي شتموك رمز لأسمن العجول
 أعتقد إن أكبر حماقة إنك تشتم رسول

* كتبت هذه الكلمات ردا على الإساءة للرسول (ص) ٢٠٠٦ م .

الصلاة على الحبيب

صلِّ على الحبيب قلبك يطيب
كلمة بنسمعها من البعيد قبل القريب
كلمة اليّ يحافظ عليها عمره ما يخيب
جرّب حبيبي ولا تسألش طيب
صلِّ على الحبيب قلبك يطيب

الصلاة عالحبيب تملأ القلب انشراح
الصلاة عالحبيب تجيب بدل الضيق البراح
الصلاة عالحبيب تجيب بدل الحزن أفراح
وهيّ اليّ تخليّك لأوامر ربّك تستجيب
صلِّ على الحبيب قلبك يطيب

إزاي يا صاحبي تبخل بالصلاة على حبيبك
 إزاي وهو اللي هيشفع لك ولا يمكن يسبيك
 إزاي وهو أمله الجنة تكون من نصيبك
 راجع عاداتك .. وكتر صلاتك .. خلّيك لبيب
 صلّ على الحبيب قلبك يطيب

كتر من الصلاة على قد ما تقدر يا غالي
 وخليها أنيسك دايمًا في كل الليالي
 دي هي نجاتك وهي طريقك للمعالي
 داوم يوماتي قبل الشروق وقبل المغيب
 صلّ على الحبيب قلبك يطيب

عائليّات

الأم

من غير لف ولا دوران ولا محلسة
 الأم دي فعلا أكبر وأعظم مدرسة
 مين غيرها اللي خرج عظماء الطب والهندسة
 مين غيرها لما الابن بيتعب بتتعب معاه
 مين غيرها لما الابن بينجرح قلبه بتقول آه
 من غيرها اللي يعرف اللي في قلب ابنها ولو خباه
 يا سلام على دي كلمة يا سلام الأم
 دي هي الدرع الواقى وهي الجناح اللي بيضم
 دي هي القلب الحنون اللي بيزيل الهم
 أمي .. أمي .. مش عارف أعبر إزاي ؟
 التعبير كامل في قلبي وعلى لساني مش جاي
 أنتِ شايفاه في عيني يبكي مع الناي

يقولك أنتِ حبيتي أنتِ روحي .. حياتي
 أنتِ الي علمتيني الكثير أنتِ كياني وذاتي
 أنتِ الي هافضل أفكرك طول عمري لحد مماتي
 ومش برضه أنتِ الي بتفهميني بمجرد نظرة أو غمزة
 ومش أنتِ الي راعتيني في طفولتي وأيام التلامذة
 مش ده كله منك يا أفضل وأحلى ميم قبلها همزة !
 ادعيلي يا أمي أقدر أوفي جميلك ومستحيل
 ادعيلي أكون شعلة تنور للناس كل سبيل
 ادعيلي يا أم القلب الحنون والعطف الجميل
 وربنا يخليكي لنا يا أعظم وأجمل ماما
 يا أم أظرف وأحلى وأطعم ابتسامــــــــــــــــة
 يا اللي ليكي في حياة كل عظيم ألف علامة !

- كتبت تلك الكلمات وأنا في الصف الأول الإعدادي عام ١٩٧١

أسمى المشاعر

ما لقيتش شعور في الدنيا أعظم من شعور الأمومة
 شعور يخلي كل أم من أي قسوة معصومة
 شعور معانيه في كل لغات العالم والدنيا معلومة
 ما لقيتش شعور في الدنيا أعظم من شعور الأمومة

وأخص كمان معاه شعور عظيم وهو شعور الأبوة
 شعور يعطي لكل راجل ولو كان ضعيف معاني القوة
 شعور ساكن حتى في قلب الجبابة ومتعمق لجوة
 شعور طبيعي والقلوب اللي بتخسره بتبقى مدمومة
 ما لقيتش شعور في الدنيا أعظم من شعور الأمومة

إنت معاك كنز عظيم ياللي ليك والدين
 وكل تعبهم معاك هو في رقبك دين
 احرص على رضاهم حتى ولو حتعطيهم منك عين
 واحمد ربك إنه خلاهم لك ولا خلى نفسك محرومة
 ما لقيتش شعور في الدنيا أعظم من شعور الأمومة

ياريت تتذكر وصية ربك وبالوالدين إحسانا
 وخليك عارف إن ربك برعايتهم نصحنا ووصانا
 ولو فكرت يوم تغضبهم فربك بيعلم باللي جوانا
 وإي نظرة غضب منك بترجع لقلبك خناجر مسمومة
 ما لقيتش شعور في الدنيا أعظم من شعور الأمومة

يالي بتعق والديك بكـرة حـيـكون لك أولاد
 وربك برحمته وعدله دايمًا بيعامل خلقه بالمرصاد
 وكما تدين تدان وراجع شـوـية تاريخ الأجداد
 واللي ما فيه خير لأهله الرحمة عنده معدومة
 ما لقيتش شعور في الدنيا أعظم من شعور الأمومة

رسالة وداع

ما لقيتش حبر لقلمي غير الدموع
ما لقيتش غير الكتابة تصبر قلب موجوع
حقيقي يا أمي سفرك خلاص ماليه رجوع
حقيقي خلاص صوتك مش حيكون مسموع
ما لقيتش حبر لقلمي غير الدموع

في سلامة الرحمن نامي يا أغلى أم
نامي في قبر لازم للجميع في يوم يضم
وده دور و داير على الكل لازم يعم
والشاطر هو اللي يقابل ربه بقلب قنوع
ما لقيتش حبر لقلمي غير الدموع

والله يا أمي دعواتي ليكي خالصة ودائمة
وعيني بتبكي فراقك حتى وهي نائمة
وملامح وشي لفراقك عن الفرحة صائمة
وقلبي اتحرم الحنان وصار مقهور من الجوع
ما لقيتش حبر لقلمي غير الدموع

سامحني يا عظيم أنا بحكمك والله راضي
لكن أمي كانت صورتها دايا قصادي
والكون من بعدها قدامي والله فاضي
وعمري ما حأتني إلا يوم رؤاها يوم الرجوع
ما لقيتش حبر لقلمي غير الدموع

- كتبت في عام ٢٠٠٦ م بعد وفاة ست الحبايب ٢٤ / ٧ من العام نفسه

فان أسبوع

مر على فراقك يا حبيبتى بس أسبوع
 أسبوع حسيت فيه بالألم بالحزن بالجوع
 حسيت كل عضو في جسمي بقى موجدوع
 أنا مش هبالغ وأقول نزلت من عيني الدموع
 أنا مش هاهول وأقول قلبي خرج من الضلوع
 أنا مش هاقول الأمان صار من نفسي مخلوع
 ولا هاقول حوار عقلي مع قلبي بقى مش مسموع
 أنا بس هاقول إن اللي مخليني صابر وقنوع
 إن عندي أمل في ربنا بقرب العودة والرجوع
 ساعتها بس هترجع الحياة ويكتمل الموضوع
 ساعتها بس هيرجع قلبي يبقى للحب ينبوع

الوسادة الخالية

لولا خوفي من الجنون لكنت كلمت الوسادة
 ولو معايا ميكروفون كنت ناديت ع السعادة
 ولولا كرهى للمرارة كنت شربت القهوة سادة
 حزنا وزعلا على فراق الغالية أم حمادة
 لولا خوفي من الجنون لكنت كلمت الوسادة

شعوري في غيابك ماله وصف ولا تحديد
 شعور مخليني ماشي كأني متكبل ف الحديد
 مخليني شايف النهاردة زي امبارح من غير جديد
 والى مصبرني إن ولادي لهم حق فيك وزيادة
 لولا خوفي من الجنون لكنت كلمت الوسادة

أول يوم بعد غيابك كتبت قصيدتين على قدي
 قصيدتين طالعين من قلبي أنا : زوجك مجدي
 قصيدتين وقفت في وصف شعوري فيهم عند حدي
 لكن من الحزن خايف يحيلي لفت نظر أو إفادة
 لولا خوفي من الجنون لكنت كلمت الوسادة

يارب مد في عمري وعمر زوجتي كمان
 يارب عشان خاطري قرب الأيام وقصر الزمان
 يارب ساعمني إذا بالغت في وصفي للحرمان
 إنت عالم باللي في ضميري : إن الحب كله ليك والعبادة
 لولا خوفي من الجنون لكنت كلمت الوسادة

تحية زوج مخلص

تحية من زوج مخلص لزوجته على صبرها
 تحية بماء الذهب تنكتب بعد عمر طويل على قبرها
 تحية ليها مكان في قلبي أكبر من ملك أبرهه
 تحية يمكن في يوم تكون وسام على صدرها
 تحية من زوج مؤمن وباصم بالعشرة على قدرها
 تحية من زوج شاف معاها في سود الليالي بدرها
 تحية من زوج لو ندرت أمامه بالغالي يوفي ندرها
 تحية من زوج لو أمرت بالمستحيل ينفذ أمرها
 تحية من زوج بيدعي لربه يطول ويبارك عمرها
 تحية من زوج داعي ربه يديم عليها سترها
 ويحفظ لنا ولادنا ويحمينا من شر الدنيا وغدرها

نصيحة وحيد

يا ليلي بتشتكي من فراق الأهل وبتصرخ وتقول
هل فكرت إنك في يوم حتفارق فيه الأهل على طول
هل فكرت في السكرات لما تخليك في العرق مبلول
هل فكرت لما عالأكثاف حتكون يا غافل محمول
يا ليلي بتشتكي من فراق الأهل وبتصرخ وتقول

إنت مش عارف إن الموت قدر مكتوب ومحتوم
إنت مش عارف إن روحك حييجي يوم وتقف فالحلقوم
إمتى راح تتوقف عن الذنوب؟ وإمتى عنها راح تصوم؟
إصحى يا غافل وشيل الغطا عن عينيك يا كسول
يا ليلي بتشتكي من فراق الأهل وبتصرخ وتقول

فكر كويس في اليوم الي حتقابل فيه ربك
 فكر كويس في اليوم الي حتتاسب فيه على ذنبك
 فكر كويس في إصلاح عملك بعد إصلاح قلبك
 فكر كويس لأنك بالعربي أمام ربك حتكون مسؤول
 يا ليلي بتشتكي من فراق الأهل وبتصرخ وتقول

فكر وفكر إوعى أبدا تبطل في يوم التفكير
 الدنيا لاهية والموت سر من ربك مالوش تفسير
 والشاطر الي بيختم حياته الفانية بالخير الوفير
 أرجو تقبل نصيحتي لأجل تدخل للجنة وتنول
 يا ليلي بتشتكي من فراق الأهل وبتصرخ وتقول

مصريات

واحشاني يا مصر

واحشاني يا مصر يا بلدي بكل تفاصيلك
 واحشاني يا مصر يا بلدي والله بكل محاصيلك
 واحشني شعبك واحشني شغبك واحشني نيلك
 واحشني دقة أنابيبك.. واحشني نغمة مواويلك
 واحشني ندهة بياعينك.. واحشني والله مراسيلك
 واحشاني يا عجوزة ياللي لسه شادة حيلك
 واحشاني يا أم الدنيا ياللي في عيني راح أشيلك
 واحشاني يا مصر يا بلدي وبأقوم الليل أناديلك
 واحشني أنوارك في ليلك.. واحشني والله قناديلك
 ولو دمعتك فرت منك أنا في إيدك مناديلك
 واحشني شايك.. واحشني القهوة في فناجيلك
 واحشاني يا مصر يا بلدي: بقرآنك وأناجيلك

ولو ناديتي على يا بلدي والله فورا أنا أجيلك
خلي بالك يا بلدي إوعي يخذعك مخايلك
خلي بالك يا بلدي من الي في إيديهم أزاميلك
خلي بالك يا بلدي من الي حيلبسوك هلاهيلك
شوفي مين الي أصلح لك... خلي قلبك دليلك
واحشاني يا مصر يا بلدي والله بكل تفاصيلك

عفوا .. يا شعب الجزائر

عمر حب الوطن ما كان تعصب ولا خطيئة
 حب الوطن فطرة بتعبر عنه نفوس بريئة
 والي حصل يوم ٢٨* ما كانش حلم لكن حقيقة
 فوز مصر عاجزائر أجمل هدية حلوة رقيقة
 عمر حب الوطن ما كان تعصب ولا خطيئة

كان نفسي الدنيا كلها تشوف بسمة كل مصري
 المصري الراجل الطيب المسالم العصري
 وهو الي قال فرحتي ملت علي سمعي وبصري
 وهو الي يكره لأخوه العربي أي فكرة دنيئة
 عمر حب الوطن ما كان تعصب ولا خطيئة

مباراتنا مع الجزائر مش مجرد كورة وخلاص
مباراتنا دلت على كرامة وحب وكم إن إخلاص
مباراتنا جابت أربع أهداف كانوا زي الرصاص!
مباراتنا رفعت رؤوسنا وطففت جوانا الحريقة
عمر حب الوطن ما كان تعصب ولا خطيئة

عفوا.. يا شعب الجزائر إوعى تزعل منا
محبة كل العرب مكتوبة مع كل خلية في دمنا
لكن قبول الذل والإهانة شيء مش من طبعنا
إحنا شعب طيب قلوبه بالخير والله مليئة
عمر حب الوطن ما كان تعصب ولا خطيئة

حروف اسمك يا بلدي بتعزف لحن جميل
الميم مدفع في قلبك ياللي عايز شعبنا يبقى ذليل
والصاد صدرنا مفتوح بالخير وما في عندنا بديل
والراء رابع هدف يا جدو كان حكم وقدر ومشية!
عمر حب الوطن ما كان تعصب ولا خطيئة

- ٢٨-١-٢٠١٠ يوم فوز مصر على الجزائر ٤-٠

يا كويبن

عشت على أرضك يا كويت واتعلق بيبك فـؤادي
 عشت على أرضك يا كويت أكثر ما عشت في بلادِي
 عشت على أرضك يا كويت وربيت فيك أوْلا دي
 عشت على أرضك يا كويت وبخيرك اتحقق مرادي
 عشت على أرضك يا كويت و من خيرك دايماً بنهادي
 حروف اسمك يا كويت شايفها عليّ بتنادي
 الكاف بتقول لي كرمي أنا وفرتـه في كل وادي
 والواو بتقول لي ولـدي في تعليمه عليك اعتمادي
 والياء بتقول لي يدك في يدي نصـدّ المعادي
 والتاء بتقول لي ترابي لازم تصونـه الأيادي
 وعرفت أهـلك يا كويت ملكـوا مني ودادي
 وشفـت منهم وفاء بكـرة أحكيـه لأحفادي
 ومهما غبت عنك يا كويت صورتك بتفضل فُصادي
 دام عزك يا كويـت ويحفظـك ربنا الهادي

عام بعد النقاد

فات عام بالكمال والتمام بعد فراق أهل الكويت
 فات عام بعد الغربة ورجعت لأهلي ورديت
 ومع إن مشاعري هتشوفوها مع كل سطر وكل بيت
 اسمحولي أوصف لكم اللي شعرت بيه وحسيت
 فات عام بالكمال والتمام بعد فراق أهل الكويت

دخلت الكويت جاي وحدي من بلاد بعيدة
 وخرجت من الكويت ومعايا حب كبير وروح جديدة
 ولكل أهل الكويت باكتب وأسطر لهم أجمل قصيدة
 ربنا يحفظهم ويكرم أصلهم من بيت لبيت
 فات عام بالكمال والتمام بعد فراق أهل الكويت

الغربة يا جماعة عمرها ما كانت غربة أبدان عن بلدان
الغربة الحقيقية فعلاً هي غربة القلوب عن الإيمان
الغربة الحقيقية فعلاً إنك تنسى تماماً إنك إنسان
الغربة الحقيقية انعدام قيمتك سواء رحت أو جيت
فات عام بالكمال والتمام بعد فراق أهل الكويت

يارب بعدد كل من شرفني أعلمهم حروف لغة كتابك
يارب بعدد كل عبد ضعيف جالك ودق على بابك
يارب بحق عجزنا أمام قدرتك وذلنا أمام عظمة جنابك
يارب ارض عني واقبلني بحق ما ركعت لك وصليت
فات عام بالكمال والتمام بعد فراق أهل الكويت

٢٠٢١ / ٩ / ١٥ -

بمناسبة مرور عام كامل على مغادرة دولة الكويت الحبيبة

العب غيرها

ياللي بتحاول تشعل الفتنة في مصر أو تثيرها
 قول لكل من خطط لها.. قول لمديرها:
 اقرأ كويس تاريخ مصر وتابع خط سيرها
 وصدقني حط حصوة في عينك ياخايب والعب غيرها
 ياللي بتحاول تشعل الفتنة في مصر أو تثيرها

ولع مباني واحدف حجارة زي ما إنت عايز
 اصرخ وهلل ووسوس وعبي الإزازيز
 لكن يا سفيه إتاكد إنك لايمكن حتكون الفايز
 ومصر محفوظة بحفظ ربنا اللي ضمن لنا خيرها
 ياللي بتحاول تشعل الفتنة في مصر أو تثيرها

خطوا عينكم على بلادكم يا أهل مصر
 خلوا عينكم مفتوحة في كل وقت وفي كل عصر
 دي حته عشة في بلادنا أغلى من مليون قصر
 مصرنا هي مملكتنا الغالية وإخلاصنا هو أميرها
 ياللي بتحاول تشعل الفتنة في مصر أو تثيرها

مصر يا بلدي حبنا ليكي هو أكبر ضمان
 ضمان للأمن والمحبة والإنتاج كمان
 ضمان يشهد عليه ربنا الرحيم الرحمن
 شهادة كتبناها بدمنا من أولها لآخرها
 ياللي بتحاول تشعل الفتنة في مصر أو تثيرها

سألت التاريخ

سألت التاريخ : ليه طعم اللقمة بقى مُرّ؟!
 ليه حالنا دايا حزين وصار ما يسرّ؟!
 ليه بقينا في ركب الحضارة للخلف دُرّ؟!
 ليه الأخ ما يفكر ينفع أخوه وعاوز يضُرّ؟!
 ليه الشيطان بقى واخد شبابنا للجحيم بيجرّ؟!
 ليه جيب المسلمين بقى مثقوب وعمّال يُخَرّ؟!
 ليه خير أمتنا في جيوب أعدائنا بيشرّ؟!
 ليه ليل الأمة بقى طويل ومش عاوز يمُرّ؟!
 رد التاريخ وقال : من غير ما نحكي كثير ونكُرّ
 المرارة مستمرة مادام صوت الحق أسير مش حرّ!!

سامحني يا بحر

إزاي يا بحر ما كتبتش عنك قبل كده ؟!
إزاي إيدي ما كانتش لإعجابي بيك مؤكدة ؟!
إزاي وإنّ آية من آيات ربنا المتعددة ؟!
لأ .. دا إنت أكبر آية متميّزة متفردة
إزاي يا بحر ما كتبتش عنك قبل كده ؟!

سامحني يا بحر إذا كنت شوية متأخر
سبحانه ربي الي سهلك لنا وسخر
سبحانه الي نزل المطر من مائك المتبخر
سبحانه الي جرّى ماءك زي الدم في الأوردة
إزاي يا بحر ما كتبتش عنك قبل كده ؟!

الله يا بحر عليك وانت ساكن وهادي
الله عليك وانت إلهامي وزادي
الله يا بحر عليك بعد ربي في الرزق اعتمادي
سبحانه ربي الي خلاك سبب في ترفيق الأفئدة
إزاي يا بحر ما كتبتش عنك قبل كده ؟!

الله يا بحر عليك وانت غضبان وثاير
الله يا بحر عليك وانت زعلان وفاير
الله يا بحر لما بتنذر كل عاصي وجاير
ياريت يا بحر الناس تكون لأخلاقك مُقلّدة
إزاي يا بحر ما كتبتش عنك قبل كده ؟!

- كتبت هذه الكلمات على ضفاف الخليج يوم ٢٠٠٦ / ١١ / ٢٧ -

يبب .. ييبب .. أهلي

اسمك يا أهلي اسم على مسمى
نادي جمع الأهل كلهم أحلى لمة
وضم في سماه كل النجوم أقوى ضمة
اسمك يا أهلي اسم على مسمى

أقول على إيه واللا إيه ألف مبروك
أقول على كاس أفريقيا واللا البرونز المسبوك
واللا على الدوري والكاس الي فيه مشبوك
فرحتنا بنجاحك يا أهلي أكبر من الثانوية العامة
اسمك يا أهلي اسم على مسمى

الي يعجبني فيك يا أهلي إنك رمز للأخلاق
 وإنك دايمًا للبطولات متربص ومشتاق
 وإنك بتحطم الصخر وتبخرق الأنفاق
 حصوة في عين الي شاف نجاحك ولا سمى
 اسمك يا أهلي اسم على مسمى

وأبو تريكة ليه مني ألف تحية
 لعيب كان فعلا للأهلي أغلى هدية
 لعيب بفضله خلّى الأهلي مية مية
 يا ريت كل اللعبة بأخلاقك تكون مهمة
 اسمك يا أهلي اسم على مسمى

- كتبت بمناسبة فوز الأهلي بالمركز الثالث على مستوى أندية العالم ديسمبر
 ٢٠٠٦م

مجديات

هَدْيِ اعْصَابِك

هَدْيِ اعْصَابِك يا حَاجِ مَجْدِي
 ارمي حمولك على الرحمن ياعم هدي
 هَدْيِ وخلي الهموم وراك تعدي
 هَدْيِ وقول بنعمة ربي محدش قدي
 هَدْيِ اعْصَابِك يا حَاجِ مَجْدِي

فكر شوية بالله عليك
 فكر وحس بقلبك وشوف بعينيك
 فكر ودقق هتلاقي الخير في إيديك
 فكر ولا تخلي الشيطان ياخذ معاك ويدي
 هَدْيِ اعْصَابِك يا حَاجِ مَجْدِي

حياتك مهـا طالت هـتمـر في ثـواني
وبعد موتك هـترجع لـي خـلقـك تـاني
وبعمـلك تـعيش في جـنة أو في جـحـيم تـعاني
اصحى وفكر في نـجـاتـك بـشـكل جـدي
هـذي أعـصابـك يا حـاج مـجـدي

أرجع أحذرـك من الدـنيا مـره تـانيـة
وهـفضـل أحذرـك مـنـها كـل ثـانيـة
افهم يا خـايـب مـعـنى إـنـهـا فـانيـة
افهم واتحدى الشـيـطان وانجـح في التـحدـي
هـذي أعـصابـك يا حـاج مـجـدي

كلمة أخيرة واعتبرها مني نصيحة
 خسارتك يوم الحساب هي أكبر فضيحة
 وبحرصك على الطاعة طريقتك صحيحة
 والإخلاص لله دايما للجنة بيـودّي
 هَدْيِ أَعْصَابِكَ يَا حَاجَ مُجْدِي

العودة الحميدة

مال قلمك يا مجدي بقى ناشف ويابس
مال وجهك الباسم بقى واجم وعابس
فين قلبك الي كان للتقوى والإيمان لابس
مالك بثقتك ونفسك مابقيتش حاسس
مال قلمك يا مجدي بقى ناشف ويابس

فضفض يا مجدي وإوعى تزهد في الكتابة
خلي قلمك دايمًا سيال إوعى إوعى الكآبة
إوعى تنسى إنت مين واحذر تتوه جوه غابة
إنت مجدي الي قلمه مثل سيف الفارس
مال قلمك يا مجدي بقى ناشف ويابس

حبر قلمك يا مجدي على الورق هو الدموع
 وكل حرف في كلامك يعبّر عن قلب مـوجـوع
 عبر وقول واكتب إوعى تملّ الرجوع
 خليك حاضر الذهن ودائماً للشعر مارس
 مال قلمك يا مجدي بقى ناشف ويابس

عمرّك يا مجدي ما كتبت كلمة للنشر أو للدعاية
 كلامي كله فضفضة وتعبير عن إحساس جوايا
 وعمرى ما فكرت اكتب لمكسب واكتفيت بالهواية
 اكتب يا مجدي وخط بقلمك وفك المحابس
 مال قلمك يا مجدي بقى ناشف ويابس

عهد وهمة

عمر اليأس ما هيعرف لقلبي طريق
عمر ي ما هأنزل بحر الهزيمة غريق
عمر ما هيهز إيماني شيطان أو حتى فريق
أنا المسلم الواعي ومعايا قرآني رفيق
عمر اليأس ما هيعرف لقلبي طريق

مين غير الرسول يقدر يكون معصوم؟!
مين وكيله ربنا ولا يقدر من الكبوة يقوم؟!
مين يعرف أجر الصبر ويقدر عنه يصوم؟!
مين قدوته محمد ويحصل في فهمه حريق؟!
عمر اليأس ما هيعرف لقلبي طريق

أنا مؤمن وعارف إن الدنيا فانية ودوارة
 أنا عارف إننا فيها يادوب بنعبي استمارة
 وكل واحد فينا بيعبر عن نفسه بأبسط عبارة
 وكل واحد يوم الحساب هيختار مين الصديق
 عمر اليأس ما هيعرف لقلبي طريق

دين ربنا منصور لازم وحتمًا ولا بد
 وجادل معايا زي ما أنت عاوز وهات وخذ
 لكن جهنم جزاء كل من وقف قدام الحق يصد
 والشاطر فينا يختار بين أبو جهل وبين الصديق
 عمر اليأس ما هيعرف لقلبي طريق

حقيقة الدنيا

دنية ايه دي يا خايب الي تحمل همها !
دنية مالكش فيها نايب واسأل ربها
اسأل عنها سبحانه الي خلقها ولمها
قول له تساوي عندك كام بشحمها ولحمها
هيقولك ما تساوي جناح بعوضة بدمها !
دنية ايه دي يا خايب الي تحمل همها !

الي بيدور على الخلود يخلي الجنة قدامه
جنة عرضها السماوات والأرض والكون بتمامه
جنة عاوزة إنسان يفرض على الناس احترامه
بحبه لدينه وأخلاقه وكمأن ابتسامه
وساعتها هيشعر إنه بيحقق مع الكون سلامه

وساعتها هتصغر الدنيا في عينه بطولها وعرضها !
 دنية ايه دي يا خايب الي تحمل همها !

صدقني خلي الدنيا دايا في إيدك
 شيلها من قلبك وقول للكون كله أنا سيدك
 أنا خليفة من ربي الي خلقك ويقدر يعيدك
 أنا أستاذك وعمري أبدا ما هأكون من عبيدك
 خلي الدنيا مزرعة للآخرة وصاحب الي يفيديك
 وصدقني يا صاحبي جهنم ونارها والله ما حدش قدها !
 دنية ايه دي يا خايب الي تحمل همها !

بداية ونهاية

اسمحيلى يا اثنين وعشرين أكلم أختك دقايق
اسمحيلى أو دّعها وأقول لها بعض الحقايق
اسمحيلى أقول لها كلام من ذهن رايق
اسمحيلى يا اثنين وعشرين أكلم أختك دقايق

مع السلامة يا واحد وعشرين بأحداثك وأحوالك
مع السلامة سواء فيك نور أو حتى ظلام حالك
مع السلامة يا اللي أخذت من عمرنا ما بدالك
مع السلامة فعلاً وبأقولها وأنا مش متضايق
اسمحيلى يا اثنين وعشرين أكلم أختك دقايق

ياريت يا اثنين وعشرين تكوني علينا ضيف خفيف
 ياريت تكوني علينا من ضمن نعم ربنا اللطيف
 ياريت تطهري بلادنا ونفوسنا من كل مرض مخيف
 ياريت تصحّي الي نايم وكمان توعّي الي فايق
 اسمحيلي يا اثنين وعشرين أكلم أختك دقائق

خَلِّي بالك يا صاحبي دي الأيام بسرعة تجري
 خَلِّي عينك على الحسنات وقول لها : فين أجري
 وابعد عن الظلمات وقول خلاص طلع فجري
 وسيب مكانك بين الرُّكَّاب وخليك إنتَ الي سايق
 اسمحيلي يا اثنين وعشرين أكلم أختك دقائق

الغربة الطويلة

كنت فاكراً إليه يا مجدي بعد الغربة الطويلة
كنت فاكراً هتلاقي الدنيا قدامك مفروشة بنجيلة
كنت فاكراً هتلاقي الناس في أخلاقها أصيلة
كنت فاكراً هتلاقي السما صافية والنسمة علية
كنت فاكراً إليه يا مجدي بعد الغربة الطويلة

إوعى تزعل لو لقيت اللي حسبتة طلع سراب
إوعى تشيل في نفسك وتنسى طعم الطعام والشراب
إوعى يصيبك العطب ويطول قلبك الخراب
إوعى تنسى إن معاك رب بيزيل هم الخفيفة والثقيلة
كنت فاكراً إليه يا مجدي بعد الغربة الطويلة

يا مجدي الحسبة بسيطة وما في أبسط من العبارة
 لازم يا غالي تصحح جواك وكم ان تغير النظارة
 جواك هو اللي بيحلّ الدنيا لا طيب ولا استشارة
 ارجع لربك اللي من غيره ماليك حول ولا حيلة
 كنت فاكر إيه يا مجدي بعد الغربة الطويلة

خاطرة!

لو حياتك في الدنيا يا غالي مشيت زي ما أنت عايز
منين ساعتها هتجيك الدرجات وتنول الجوايز
منين هنعرف معادن الناس والصفوف تتمايز
لو حياتك في الدنيا يا غالي مشيت زي ما أنت عايز

الدنيا يا صاحبي عند خالقها ما تساوي جناح بعوضة
الدنيا إيه غير شوية أمراض وقلق وضوافر مقروضة
وطعم الدنيا جنب طعم الجنة صدقني يجيب الحموضة!
وكل كنوز الدنيا جنب ريحة الجنة ما تساوي شوية برايز
لو حياتك في الدنيا يا غالي مشيت زي ما أنت عايز

الشيطان دايمًا يصور لنا الدنيا حلوة وعروسة
 الشيطان عاوز رَجُلنا تبقي في الوحل دايمًا مغروسة
 الشيطان وأعوانه نفوسهم من أهل الإيمان مفروسة
 وكل وعودهم لنا عبارة عن هَوَاٍ متعَبِّي في أزايز
 لو حياتك في الدنيا يا غالي مشيت زي ما أنت عايز

سعادتك يا غالي دايمًا هتلاقيها بس في الطاعة
 سعادتك في العبادة الي فيها الحماية وفيها المناعة
 سعادتك إنك تواجه شيطانك بكل قوة وشجاعة
 سعادتك إنك تفكر يوم القيامة إزاي تكون الفايز
 لو حياتك في الدنيا يا غالي مشيت زي ما أنت عايز

نصيحة محب

طرد الهموم والأحزان من قلبك مفتاحه بإيدك
 مفيش حد غيرك يقدر للطريق يرجعك ويعيدك
 قوم وشيل إيدك من على خدك ووقف تنهيدك
 قوم وانفض الكسل وثور على رتابتك وتقاليدك
 قوم وارسم البسمة على وشك وافرد ياعم تجاعيدك
 قوم واعلنها ثورة على العجز والقلق وحطم حديدك
 قوم واهجر الملل واطهر مواهبك وطلع جديدك
 قوم واتحدى الشيطان وقل له أنا مش من عبيدك
 قوم ودور على الخير في كل شيء ممكن يفيدك
 قوم وناجي ربك يارب أعني على ذكرك وتحميدك
 قوم وإنت بخير طول ما مالك مش هو سيدك
 قوم وإنت بخير طول ما طريقك ما بينحرم من تعبيدك
 قوم وجدد حياتك وخلي كل يوم هو يوم عيدك

قعدة الصبح

يا سلام على قعدة الصبح والنهار يشقشق
يا سلام على الهدوء والنور في السما بيلاً
يا سلام على أجمل موسيقى والعصافير بتزقزق
يا سلام على كوباية الشاي والبسكوتة تتسأسأ
يا سلام على قعدة الصبح والنهار يشقشق

كل واحد فينا محتاج للحظات سكون مع نفسه
كل واحد محتاج يخلع أي هم محاطه أو لابسه
كل واحد فينا محتاج يطلع إحساس جوه حابسه
كل واحد محتاج يتحدى الهموم ويقول لها : لأ.. لأ
يا سلام على قعدة الصبح والنهار يشقشق

كورونا نيات

١

موضوع انتشار الفيروس فيه لنا عبر ودروس
 فكر معايا وسيبك من هم الأرزاق والفلوس
 وهمتك معايا نطلع الإيمان اللي في قلبك محبوس
 وخلينا نعيد حساباتنا وعلى متاع الدنيا برجلينا ندوس
 موضوع انتشار الفيروس فيه لنا عبر ودروس

بيقولك حرّص كويس من فيروس كورونا
 وتابع الأنباء من وكالة سين وصاد وكونا
 واقفل بيانك كويس وإوعى تقف في البلكونة
 واغسل خضارك كويس لأحسن يكون فيها مدسوس
 موضوع انتشار الفيروس فيه لنا عبر ودروس

الأخذ بالأسباب شيء رائع نتفق عليه كلنا
لكن قبل كده لازم نحسن التوكل على إلهنا وربنا
ولازم نراجع أفعالنا ونتوب كويس من ذنبنا
لأنك مكتوب عليك الموت حتى من غير الفيروس
موضوع انتشار الفيروس فيه لنا عبر ودروس

الفيروس رسالة لازم كلنا نقراها بعناية
الفيروس يقولك خلي حياتك قدامك كما المראה
راجع أفعالك واوزنها بميزان الهدى والهداية
وخلي كل خطوة في حياتنا تمشي بأسلوب مدروس
موضوع انتشار الفيروس فيه لنا عبر ودروس

٢

ياللي كنت في يوم بتتمنى الأجازه!
 حاسس دلوقتي بالسعادة واللذاهة؟!
 بالله عليك قلي إنت حاسس بماذا؟!
 حاسس دلوقتي إنك ليك فايده أو عازهة?!
 ياللي كنت في يوم بتتمنى الأجازه!

جاتلك الأجازه وإنك في بيتك قاعد
 خايف تطلع وتساهم وتخرج تساعد
 خايف تقرب من الناس وعنهم بتتباعده
 خايف تلمس أي ورقة أو غطا إزازه
 ياللي كنت في يوم بتتمنى الأجازه!

عرفت دلوقتي قيمة الثانية في حياتك
عرفت أدإيه الناس محتاجة لمساتك
عرفت أدإيه تستعد في الدنيا لماتك
عرفت أدإيه لازم الناس تكون للآخرة منجزة
ياللي كنت في يوم بتتمنى الأجازه !

يارب من اليوم صحح للناس مفاهيمها
يارب من اليوم اهدي عاصيها وثبت مستقيمها
يارب الناس جاية لك بشبابها وحريمها
يارب اكفينا شر الوبا واجعل لنا بعد البلا مفازا
ياللي كنت في يوم بتتمنى الأجازه !

٣

صلوا في الرحال، صلوا في البيوت
 كلمة كانت صدمة وسط السكوت
 كلمة اتقالت بصوت باكي مكبوت
 كلمة طيحت كل الأقنعة قبل ورق التوت
 كلمة كنا نتمنى ما نسمعها قبل ما نموت
 يارب يا سامع دعاء المكروب مع القنوت
 يارب ياللي نجّيت موسى من فرعون والجبروت
 يارب ياللي خرّجت يونس حيّ من بطن الحوت
 اكشف عنا البلاء وخلي الغمة عنا نفوت
 وساحنا عما بدر منا يا مالك الملك والملكوت
 واقبلنا نرجع لبيتك على رِجلنا قبل التابوت.

٤

يارب كلها أيام والكل مستتي العيد
 يارب مع إنه قريب لكن شايفينه بعيد
 خايفين يجي وما يكونش الكل فينا سعيد
 خايفين الغمة تطول والكرب علينا يزيد
 خايفين الخوف يظل معشش جوه الوريد
 لكن عشمنا في رحمتك يا ذا العرش المجيد
 إنك تنظر إلينا نظرة الرؤوف الحميد
 يارب ما يصعب عليك أمر إذا ما بتريد
 يارب دعوناك ورفعنا خفق القلب قبل الإيد
 إنك لا تؤاخذنا بفعل كل جبار عنيد
 طغى على عبادك وكبّل أولياءك في الحديد
 يارب بنعاهدك عهد متوثق وشديد
 إننا نعيد النظر في حياتنا من جديد
 يارب بحق ليلة القدر والتهليل والتحميد
 ارفع عنا البلاء وخلي كل أيامنا عيد .

٥

في لحظة صفا دار بيني وبين الكورونا حوار
 ولو كنت مهتم تعالى اسمع وشوف الي صار
 قلت له: إنت حبست الناس وقفلت عليهم كل دار
 وخليت الرعب والخوف بينهم بقى سريع الانتشار
 وناس كثير ماتت بسببك وزادت الأضرار
 وحاجات كثير غيرها خلّت العالم في أمرك مختار
 قام قال لي وهو هادي وكأنه يشرب سيجار
 شوف ياسيدي اسمع ردي بعدما تصليّ عالمختار
 فأنا سواء كنت عقاب رباني أو لعبة صنعها الكبار
 المهم إني جندي وجاتني أوامر من ربنا الجبار
 إني لازم أحطّ كل واحد فيكم قدام نفسه كما المنظار
 وقال لي: طب ما فيكم ناس موجودين وهما فعلا كتار

عملوا حاجات كثير تشيّب وتنشر الرعب والأخطار
أولهم ناس بدل ما يدوروا عالعلاج قاموا رفعوا الأسعار
وناس صممت ما تنزل ولا فلس من تمن الإيجار
وناس غيرهم ما كانش همهم ناس بتموت بس همهم سعر الدولار
وفوق ده كله ناس لآتفه الأسباب كانوا يشعلوا في الحرب الشرار
واسأل عنهم التاريخ ، اسأل هتلر ومن قبله كمان التتار
يا محترم ! أنا اللي عملته لو حطّيته في الوزن والاعتبار
والله ما يجي ذرّة بالي بتعملوه في بعضكم بالليل والنهار !!

٦

في حياتنا أكثر من فيروس قاتل فتّاك
 فيروس ما وراه إلا الخراب والإهلاك
 فيروس يلزمك يحاوطك صباحك مساءك
 فيروس يخليّ حتى روحك ما تسلم من أذاك
 في حياتنا أكثر من فيروس قاتل فتّاك

وأول فيروس اسمه الغيبة والنميمة
 ودا يخليك تذكر الغائب بعيبة أو شتيمة
 يخليك لا تعمل لأعراض الناس أي قيمة
 ودا يخليّ حسناتك تروح بعدما كانت معاك
 في حياتنا أكثر من فيروس قاتل فتّاك

وكمان فيروس اسمه الكذب والنفاق
يخلي ظاهرك المودة والحقد كامن في الأعماق
يخليك عايش تبذر بذور الوقيعة والشقاق
يخليك تفطر عالايمان لكن تبات فاسق في عشاك
في حياتنا أكثر من فيروس قاتل فتاك

وأخطر فيروس اسمه اللهو والغفلة
يخليك عايش حياتك كأنك في حفلة
يخلي كل السبل أمام الخير قدامك قافلة
يخليك فاكر هتخلد هنا وتنسى الأصل هناك
في حياتنا أكثر من فيروس قاتل فتاك

نصيحة قولها لنفسك قبل ما تكون لأحبابك
 قول لنفسك هيجي يقوم وتقرأ بنفسك كتابك
 هيجي يوم وتتوجه لفوزك أو يمكن عذابك
 إصحى وراجع وخلي عملك الصالح بكرة يستنك
 في حياتنا أكثر من فيروس قاتل فتاك

٧

قلمك واخذك على فين يا حاج مجدي؟!
 قلمك بيقول : قول للناس الأزمة هتعدّي
 قول للناس أمامكم عدو عاوز منكم تحدي
 أمامكم عدو مغرور بيقول للكون ما حد قدي
 أمامكم عدو عاوز مواجهة وانتم قد التصدي
 عدونا الفيروس عاوزنا نتعامل بشكل جدي
 عاوزني أتابع وأحرّص ما أخط إيدي على خدي
 عاوزني أكون إيجابي وأشارك بشكل مجدي
 عاوزني أرجع لربي، أصوم وأصلي وأفدي
 عاوزني أسمع لنبض قلبي بيقول : قربت أصدي
 اكتب بخط واضح وقول للناس إوعوا التردي
 قوم يامسلم لربك قومة رجال ! إوعك تهدي !!
 رمضان عالأبواب ياللا نقول كلنا للنفس استعدي

٨

الشیاطین من قبل رمضان بیحضرّوا للضلال فیروسائهُ
 بیحضرّوا مع القذارة للفساد أفلامه ومسلسلاتهُ
 بیحضرّوا وكل همهم إضلال المجتمع وتضییع حسنائهُ
 والكارثة الكبرى إن إحنا اللي بنقول لهم کمان هاتوا
 الشیاطین من قبل رمضان بیحضرّوا للضلال فیروسائهُ

کل فیلم أو مسلسل فاسد هو من الکورونا أشد
 کل ضلال من عندهم یعمل قدام قلوبنا سد
 کل فساد من عندهم لازم نحط له کلنا ألف حد
 عیب کبیر علینا نتابع فساد عارفين سلیائهُ
 الشیاطین من قبل رمضان بیحضرّوا للضلال فیروسائهُ

خلونا كلنا نتفق من اليوم لازم كلنا نقاطع
لازم كلنا نقف قدام الفساد بشكل قاطع
لازم نخلي رمضان في قلبنا نابض وساطع
لازم نعيش رمضان بكل روحانياته ونفحاته
الشياطين من قبل رمضان بيحضروا للضلال فيروساته

رمضان جاي وفرصة لينا نبرمج حياتنا صح
رمضان فرصة نقول لكل الفاسدين كفاية بح !!
رمضان فرصة نقول لهم سلعتكم بارت وسوقكم شح
رمضان فرصة ندعي ربنا يكشف عن الوطن كرباتة
الشياطين من قبل رمضان بيحضروا للضلال فيروساته

٩

الكورونا ساعات من الألم خلاني أضحك جامد
 أضحك غصب عني وأنا والله مش عامد
 بأضحك وأنا صاحي وواقف وصامد
 بأضحك وأنا راضي بالقضا وشاكر وحامد
 الكورونا ساعات من الألم خلاني أضحك جامد

بأضحك على كل واحد ماشي ولا همُّه
 بأضحك على واحد مش مكسوف على دُمُّه
 بأضحك على الناس اللي برضه بيتلمّوا
 بأضحك على ناس الوعي في قلوبهم خامد
 الكورونا ساعات من الألم خلاني أضحك جامد

الموضوع يا جماعة عاوز كل الحذر
عاوزنا ناخذ بالأسباب زائد إيماناً بالقدر
عاوزنا كلنا لازم نحاصر ونمنع الضرر
عاوزنا نسمع الكلام ونتكاتف ونتعاضد
الكورونا ساعات من الألم خلاني أضحك جامد

كلنا لازم ننتبه ونحارب الوباء
والبقاء في البيوت هو الألف والباء
والخروج بدون داعي هو قمة الغباء
وبإذن الله بتكاتفنا الوباء هيبقى هامد
الكورونا ساعات من الألم خلاني أضحك جامد

١٠

يَمَكُنْ يَكُونُ الْجَوُّ مَزْعَجٌ وَمَشٌّ رَاقِقٌ
يَمَكُنْ تَكُونُ الدُّنْيَا ضَاقَتْ قَدَامَ الْخَلَائِقِ
لَكِنْ يَعْلَمُ رَبُّنَا إِنِّي مَشٌّ خَائِفٌ وَلَا مَضَّائِقِ
لَأَنْ عَارَفٌ كَوَيْسٌ إِنْ رَبِّي هُوَ الَّذِي سَاقِقِ
يَمَكُنْ يَكُونُ الْجَوُّ مَزْعَجٌ وَمَشٌّ رَاقِقِ

أَنَا عَلَى يَقِينٍ إِنْ بَكَرَةٌ وَاللَّهُ أَحْلَى
بِأَقْوَلِهَا وَأَنَا رَجُلِي فِي الطِّينِ وَالْوَحْلِ
بِأَقْوَلِهَا وَأَنَا فِي حَلْقِي مَرَارٌ وَمَشٌّ بَاسْتَحْلَى
بِأَقْوَلِهَا عَلَى يَقِينٍ وَبَكَرَةٌ تَبَانِ الْحَقَائِقِ
يَمَكُنْ يَكُونُ الْجَوُّ مَزْعَجٌ وَمَشٌّ رَاقِقِ

حق التوكل يقول لازم ناخذ بالأسباب
حق التوكل لازم نكون في معية رب الأرباب
حق التوكل لازم ندق عالشفا كل باب
حق التوكل يقول لازم تكون متنبه وفايق
يمكن يكون الجو مزعج ومش رايق

يارب جنالك رافعين الكفوف والأأيادي
جايين نرجوك كلنا بذلنا في الساعادي
إنك تستجيب لكل عبد عليك بينادي
يارب نجينا وخليّ جوّنا دايمًا لايق
يمكن يكون الجو مزعج ومش رايق

١١

ممکن يكون الي إحنا فيه بدعوة مظلوم ؟
 ممکن دموعة واحدة تجمّع السحب وتلبّد الغيوم ؟
 كلامي فيه مبالغة وللا يمكن أكون موهوم ؟!
 بس كلامي يعرفه كويس أهل الحكمة والعلوم !
 ممکن يكون الي إحنا فيه بدعوة مظلوم ؟

إوعى حبيبي وقت الشدة تبارز ربك بالذنوب
 إوعى تنسى حق روحك وتقسي القلوب
 والحياة زي ما فيها الشروق فيها الغروب
 بادري يا غالي وخليك في حمى الحي القيوم
 ممکن يكون الي إحنا فيه بدعوة مظلوم ؟

هل تشك إن ربك قادر يكشف الغمّة؟
هل تشك إن ربك عاجز ينقذ الأمة؟
حاشا لله الي عاوزنا نوفي بالعهد والذمة
عاوزنا نخشع لجلاله : لا نستعجل ولا نلوم
ممکن يكون الي إحنا فيه بدعوة مظلوم؟

يارب سامحنا إذا كان فينا أيّ ظالم
يارب أعنا كلّنا على الحق ورد المظالم
يارب إنت وحدك الي بالقلوب عالم
يارب ما يجي رمضان ويكون فينا محروم
ممکن يكون الي إحنا فيه بدعوة مظلوم

١٢

اسمحوا لي أقدم نصيحة غالية لولادنا
 إحنا عاوزينكم اليوم تكونوا قدوة لأحفادنا
 عاوزين نقول إننا وقت الشدة صبرنا وحمدنا
 ونقول لهم كنا جدا متألمين من قعادنا
 كنا بنبكي لما كنا بنسمع الأذان عالمدة
 ولا نقدر نروح نصلي ورا شيوخنا وأسيادنا
 واللي إحنا فيه خلانا راجعنا عملنا وجردنا
 خلانا نتمنى نقرب من بعضنا بعدما بَعَدنا
 خلانا نشتاقي للأمان بعد قلقنا وسهادنا
 خلانا نقرب أكثر من ربنا اللي ياما نجدنا
 خلانا ندوّر عاخير في الناس ولقينا ووجدنا
 خلانا نُقبل أكثر عالي فيه خيرنا وسعدنا

خَلَّانَا نَرَا جَع كِتَاب رِبْنَا وَحَفْظُنَا وَاسْتَفْدُنَا
يَا رَبِّ بِحَقِّ مَا جِئْنَاكَ كَلْنَا وَلِبَابِكَ قَصْدُنَا
يَا رَبِّ بِحَقِّ عِدَدِ ذَرَاتِ الرَّمَالِ وَكَمَا بَعْدُنَا
يَا رَبِّ اكْشِفْ بِلَطْفِكَ غَمَّتْنَا بِحَقِّ مَا رَكَعْنَا وَسَجَدْنَا

١٣

خلاص من حقك تفرح ياعم
 خلاص رجعتلك حاسة الشم
 وانشال من على ظهرك أكبر هم
 وحسيت إنه ردّ في جسمك الدم
 خلاص من حقك تفرح ياعم

اسمح لي أقف معاك لحظة
 اسمعني كويس وخلي عينك جاحظة
 وهات ورقة وقلم وسجل ملاحظة :
 دي حاسة واحدة راحت عندك من كم ؟؟؟!!
 خلاص من حقك تفرح ياعم

حاسة واحدة راحت خليتك مهموم
خليتك تدور عليها طول اليوم
خليتك قلقان على نفسك من ريحة الهدوم
خليتك زي الغرقان اللي وقع في اليم
خلاص من حقك تفرح ياعم

آن الأوان تراجع نفسك المتمردة
آن الأوان تحس بنعم ربك المتعددة
آن الأوان تشوف روحك هتكون فين خالدة
آن الأوان روحك مع اللي خالقها تتلم
خلاص من حقك تفرح ياعم

السيرة الذاتية

مجدي محمدي شاعرٌ مصري وُلد سنة ١٩٥٩ في القاهرة، وهو الابن الثالث بين ستة أخوة من البنين والبنات، في سن الثانية عشر بدأ مجدي محمدي كتابة الشعر، وظهرت موهبته الشعرية في أول قصيدة كتبها حين كان في الصف (السادس الابتدائي) وعرضها على والدته التي أعجبت بها كثيراً وشجعتة على الاستمرار في كتابة الشعر.

تخرج في كلية دار العلوم جامعة القاهرة بتقدير جيد جداً سنة ١٩٨١ ، وبدأ بتحضير الماجستير في علم الحديث ، عمل مدرساً للغة العربية ومصححاً لغوياً لدى أكثر من دار للنشر والتوزيع في مصر وخارجها ، إلى أن انتقل إلى العمل بدولة الكويت مدرساً للغة العربية وظل فيها ٣٥ عاماً يعلم فيها أجيالاً من الطلاب والمعلمين الذين تتلمذوا على يديه ، وترقى خلال تلك السنوات إلى مدرس أول ثم موجه فني إلى أن تقاعد وأنهى خدمته عام ٢٠٢١ وعاد إلى بلده مصر.

كان حكماً في العديد من مسابقات حفظ وإلقاء الشعر بين طلاب مدارس الكويت.

الحياة الشخصية

متزوج وله ولدان وبتتان أنشأهم على حب الله ورسوله صلى الله عليه وسلم ومكارم الأخلاق وحب العلم والنبوغ والطموح ونفع الآخرين.

أغراض أدبه وشعره

كتب مجدي محمدي في كل المجالات : الإسلام والوطن والعائلة والعلاقة بالنفس والمناسبات الخاصة والعامة ، ولطالما كان له قصيدة جديدة ينتظرها أفراد أسرته وزملاؤه في كل مناسبة .

وعلى الرغم من إتقانه للغة العربية الفصحى إلا أنه أحب الكتابة باللهجة المصرية لتكون قريبة من جميع أطياف الشعب على اختلاف ثقافتهم وتعليمهم.

الفهرس

- بين يدي الديوان (رسالة إلى لغتي) ٨

١- إيماناً ١٠

رحلة مع سور القرآن ١١

أهل الجنة ١٦

جهنم المعذورة ١٨

خلي تكالك على الله ٢٠

مدرسة الصحابة ٢٢

كيد الشيطان ٢٦

ساعد غيرك ٢٨

مناجاة ٣١

واحد ما يصلش ٣٣

عابد المال ٣٥

إسلامنا عاوز إيه؟ ٣٨

الحجاب حجاب ٤٠

الجار قبل الدار ٤٣

طابور الجنة ٤٥

دينك .. دينك ٤٧

٢- رمضانيان ٤٨

مدرسة رمضان ٤٩

رمضان ضيف ٥١

قوم يا صاحبي ٥٣

جايلك يا ليلة القدر ٥٤

عيد الصائمين ٥٦

٣- نبويات..... ٥٨

- كلمة إلى الحبيب ٥٩
- أكبر حماقة..... ٦١
- الصلاة على الحبيب..... ٦٤

٤- عائليان..... ٦٦

- الأم..... ٦٧
- أسمى المشاعر..... ٦٩
- رسالة وداع..... ٧٢
- فات أسبوع..... ٧٤
- الوسادة الخالية..... ٧٥
- تحية زوج مخلص..... ٧٧
- نصيحة وحيد..... ٧٨

٥- مصريان ٨٠

- ٨١ واحشاني يا مصر
- ٨٣ عفوا .. يا شعب الجزائر
- ٨٦ يا كويت
- ٨٧ عام بعد التقاعد
- ٨٩ إلب غيرها
- ٩١ سألت التاريخ
- ٩٢ ساحني يا بحر
- ٩٤ بيب بيب أهلي

٦- مجديان ٩٦

- ٩٧ هذي أعصابك
- ٩٨ العودة الحميدة
- ١٠٢ عهد وهمة
- ١٠٤ حقيقة الدنيا

- ١٠٦ بداية ونهاية
- ١٠٨ الغربة الطويلة
- ١١٠ خاطرة
- ١١٢ نصيحة محب
- ١١٣ قعدة الصبح

٧ - كورونيات ١١٤

- ١ ١١٥
- ٢ ١١٧
- ٣ ١١٩
- ٤ ١٢٠
- ٥ ١٢١
- ٦ ١٢٣
- ٧ ١٢٦
- ٨ ١٢٧

١٢٩ ٩

١٣١ ١٠

١٣٣ ١١

١٣٥ ١٢

١٣٧ ١٣

١٣٩ ٨ - السيرة الذاتية